



DISPOSIZIUN DAL DEPARTAMENT **(Lag da Breil; mesiras dal dretg da pestga en cas d'eveniments spezials)**

I. Fatgs e giudicament

1. Cun la brev dals 6 d'avrigl 2018 a l'uffizi per la natira e l'ambient dal Grischun han las Ovas electricas Frisal SA annunzià ch'il batschigl d'accumulaziun Breil da las Ovas electricas Frisal SA vegnia svidà u derschentà il pli tard fin l'onn 2021. Quant enavant ch'il batschigl d'accumulaziun sto vegnir svidà u derschentà pervia da la sedimentaziun è object dals scleriments actuals. Las Ovas electricas Frisal SA han communitgà da vulair inoltrar – cur ch'igl è uschè lunsch – ina dumonda ordinaria per ina permissiun da svidar u da derschentar il batschigl d'accumulaziun Breil tenor l'art. 40 al. 2 da la lescha federala davart la protecziun da las auas (CS 814.20; LPAuas) e dumondan d'instradar las mesiras necessarias, en spezial las mesiras dal dretg da pestga.
2. Sch'igl è planisà da derschentar e da svidar implants d'accumulaziun, po il departament da construcziun, traffic e selvicultura concluder – tenor las prescripziuns da pestga vertentas (PP 2018, cifra A III) – excepziuns areguard ils utensils e las metodas da pestga, areguard il temp, las mesiras ed il dumber da peschs ch'ins dastga pigliar en las auas pertutgadas. Las regulaziuns correspondentas ston vegnir publitgadas en il fegl uffizial dal chantun Grischun.
3. Per pudair duvrar ed er decimar l'effectiv da peschs en moda uschè effizienta sco pussaivel en vista a la svidada u a la derschentada dal Lag da Breil èsi giustifitgà da relaschar ina disposiziun speziala per il Lag da Breil (nr. "1013" tenor la statistica da pestga) per exequir la pestga che vala a partir dal 1. da matg 2018 fin a sia revocaziun.

II. Decisiun

Il departament da construcziun, traffic e selvicultura

fixescha:

1. Per il Lag da Breil (nr. "1013" tenor la statistica da pestga) valan a partir dal 1. da matg 2018 fin a sia revocaziun las suandantas disposiziuns adattadas per exequir la pestga

Stagiun da pestga:

1. da matg fin e cun ils 30 da november

Mesiras minimalas dals peschs ch'ins dastga pigliar:

Naginas mesiras minimalas per tut las spezias da peschs. Tut ils peschs pigliads da tuttas classas da grondezza e da tuttas spezias ston vegnir prendids or da l'aua.

Dumber dals peschs
ch'ins dastga pigliar per di:

Naginas limitas per di per tut las spezias da peschs.

Conservaziun:

Igl è scumandà da conservar peschs vivs. Ils peschs che vegnan prendids or da l'aua ston vegnir mazzads immediatamain ed en ina moda che correspunda a la protecziun dals animals.

Statistica da pestga:

Fin e cun ils 15 d'october ston vegnir registrads ils peschs pigliads en la statistica da pestga regulara. Suenters ils 15 d'october na sto pli vegnir manada nagina statistica da pestga.

Patenta:

Tgi che posseda ina patenta valaivla d'ina stagiun, d'in mais u d'ina emna, ha il dretg da pestgar en il Lag da Breil a partir dals 16 d'october. I valan las taxas da patenta usitadas. Suenters ils 15 d'october na vegnan pli emessas naginas patentas.

2. Tut las ulteriuras disposiziuns da las prescripziuns da pestga vertentas restan en vigur e valan er per la pestga en il Lag da Breil suenters ils 15 d'october.
3. L'uffizi da chatscha e pestga vegn incumbensà da publitgar las disposiziuns spezialas per il Lag da Breil en il fegl uffizial dal chantun Grischun.
4. Communicaziun al departament da construcziun, traffic e selvicultura, uffizi per la natira e l'ambient e uffizi da chatscha e pestga.

Departament da construcziun, traffic
e selvicultura dal Grischun

Il schef:

Dr. Mario Cavigelli, president da la regenza